

14/11/2001

PM minta guru cungkil kebolehan murid

Mohd Fuad Razali

KUALA LUMPUR, Selasa - Datuk Seri Dr Mahathir Mohamad meminta guru mengetepikan pemikiran konon ada murid mempunyai otak yang lemah dan tidak berupaya menyerap ilmu yang diajar, sebaliknya menyemaikan sifat rajin dan tekun berusaha di kalangan mereka.

Perdana Menteri berkata, mereka tidak sepatutnya terperangkap dengan pemikiran sedemikian kerana maju mundur seseorang murid ditentukan oleh pegangan dan budaya hidupnya, bukan keturunan atau otak mereka.

Sehubungan itu, katanya, guru perlu mencungkil kebolehan yang ada di kalangan setiap murid serta memupuk nilai hidup yang baik di kalangan mereka agar membesar dengan pegangan hidup yang baik dan menyumbang kepada kejayaan bangsa dan negara.

"Mungkin ada pelajar yang tidak boleh menyerap ilmu tertentu seperti sains dan matematik tetapi cekap dalam lukisan. Dia boleh diajar menjadi pelukis yang cekap dan baik. Pelukis yang baik pun ada peranan dalam masyarakat seperti menjadi arkitek.

"Jadi, kita perlu mencungkil bakat yang ada pada murid dan kemudian tanam nilai yang baik ini," katanya ketika berucap pada sesi bicara perdana di Konvensyen Perdana Guru Cemerlang 2001 di sini, hari ini.

Konvensyen kali ketiga yang berlangsung selama empat hari sejak Sabtu lalu itu dihadiri kira-kira 1,000 Guru Cemerlang dari seluruh negara.

Turut hadir, Timbalan Menteri Pendidikan, Datuk Abdul Aziz Samsuddin; Setiausaha Parlimen Kementerian Pendidikan, Datuk Mahadzir Mohd Khir dan Ketua Pengarah Pendidikan, Datuk Abdul Rafie Mahat.

Dr Mahathir berkata, keupayaan murid menguasai ilmu bukan saja bergantung pada kemampuan otaknya memahami sesuatu pelajaran, tetapi juga kesanggupan dan ketekunannya mempelajari sesuatu secara berulang kali.

Katanya, ketekunan dan kesungguhan berbuat demikian membolehkan murid menjadi cekap dan pandai serta menguasai ilmu yang sukar.

"Sebagai guru, kita tahu ada murid yang rajin dan malas. Murid yang tidak cerdik tetapi jika berusaha dengan bersungguh-sungguh boleh menjadi lebih pandai daripada murid yang malas sekalipun otaknya bergeliga.

"Tuhan menjadikan manusia dengan sifat jika membuat sesuatu benda berkali-kali kita akan menjadi cekap. Jika tidak buat langsung, maka kebolehan kita tidak ada.

"Kalau buat sekali, tidak tekun dan tidak ulang membuatnya, maka sudah tentu kita tidak akan memiliki kecekapan," katanya.

Sehubungan itu, katanya, tanggungjawab guru bukan saja menyampaikan ilmu tetapi juga membentuk peribadi murid dengan menyemai sifat rajin dan tekun di kalangan mereka.

Katanya, jika sifat itu dipupuk, murid yang asalnya tidak cekap dan tidak cerdik pun boleh mencapai kejayaan dalam apa juga bidang yang diajar.

"Oleh itu, di samping mengajar sesuatu mata pelajaran, pengajaran mengenai nilai hidup mesti disampaikan kepada murid supaya mereka betul-betul mencapai kejayaan serta menyerap ilmu yang diajarkan kepada mereka," katanya.

(END)